

## SANTIAGO APOSTOLUA /C

### Sarrera oharra

Senideok: Domekea dan arren, Liturgiak Santiago apostolua ospatzera gonbidatzen gaitu, eta goazen bere eskutik Jesusen jarraitzaile izatea zer dan bilatzera eta ospatzera, eta Jainkoari eskerrak emotera apostoluei esker garalako Jesusen Jarraitzaile. Eskatu daigun ez dakiguzala falta gidariak, autorleak eta hain beharrezko doguzan profetak.

### Sarrera abestia

**GOAZEN GUZTIOK BATERA**  
Jaunarekin egotera.  
Goazen guztiok batera  
Jaunarekin egotera.

Argiaren seme eta egunaren oinordeko  
abia gaitezen danok Jaunarengana goizean,  
uxatu ditu goiz albak gure baitako ilunak,  
eta pozaldi bete sortu digu bihotzean.

<sup>1</sup> Pozik alkartu gaitezen  
Aita bai dogu laguntzen.

<sup>2</sup> Seme-alaba bezela  
zaindu gagizuz Zuk, Jauna.

### Damu otoitza

† Sarriegitan erabilten dogu siniskerea alkarrengandik bereizteko eta ez alkarren zerbitzatura jarteko. Damutu gaitезan:

- Jesus Jauna: apostoluengan aukeraketa sinbolikoa egin zenduna, *erruki, Jauna.*
- Jesus Jauna, zure jarraitzaileak erreinuaren mezulari egiten dozuzana, *Kristo, erruki.*
- Jesus Jauna, zerbitzari izateko aukeratzen eta bihurtzen gaituzuna, *erruki, Jauna.*

† Erruki dakigula...

### Lehenengo irakurgaiari oharra (Ap Eg 4, 33; 5,12.27-33; 12,2)

Ezeren autorle izateko ondo ezagutu behar da; eta autortzekoagaz bat eginda egon. Begira zelangoa dan apostoluen autorra: beldur bakoa, bulartsua, deigarria..., bizitza osoa jokoan jarten dauana. Eredugarria!

### Erantzun salmoa (66)

**Santiago Apostolua** Sal 66



Jau-na - ri kan- ta o-na da\_ ta: hain dau han- di - a bere be-ti- ko er-ru-ki - a.

### Bigarren irakurgaiari oharra (2Kor 4, 7-15)

Onura preziatua dogu sinismena, eta egoereak irakasten deusku gurea benetako sinismena dan ala siniskeria. Sinismena zaintzen, ospatzen eta zabaltzen dauana zorionsua da.

### Ebanjelioari oharra (Mk 20, 20-28)

Jainkoaren aurrean eskale jarten gara. Baina, ba dakigu, gero, zer eskatzen dogun? Hasiko bagina Espiritua eskatzetik... Egin deiogun harrerea ebanjelioari Aleluia abestuz, zutunik.

### ESKARIAK

† Jainkoak bere erregetzearen autorle (testigu) izateko aukeratzen gaitu bere Semearen jarraitzaile. Esker onez egin deioguzan gure eskariak:

–Apostoluen oinarri gainean eraikitzen dan Eliza honen alde: gaurko mundu eta egoera honetan izan daiten profetikoa eta ilunpeetan argi... *Eskatzen deusgu, Jauna, -Aita zai-*

tugulako.

—Izan daigun guztiok argi Jesusek danoi egiten deuskula dei bere jarraitzaile eta Jainkoaren erregetzearen autorle izatera... *Eskatzen deutsugu, Jauna, -Aita zaitugulako.*

—Gure lehentasunen artean pobreak, bazterreratuak, gutxietsiak, erbesteratu eta espetxeratuak izan daitezcan, eta erregetzearen poza eroan ahal izan deiegun... *Eskatzen deutsugu, Jauna, -Aita zaitugulako.*

—Aintzat hartua ez dan, edo bazterreratua dan emakumeak bere duintasunezko lekua izan daian gure Eliza honetan... *Eskatzen deutsugu, Jauna, -Aita zaitugulako.*

—Eukaristiarako alkartu garenok gure sinismena aintzat hartzen, lantzen, ospatzen eta alkarbanantzen ikasi daigun... *Eskatzen deutsugu, Jauna, -Aita zaitugulako.*

† Jainko maitalea, alkarren zerbitzari nahi gaituzuna: emoiguzu apostolu kemena zure Semearen autorle izateko gaur eta hemen.. Jesukristo gure Jaun berberaren bitartez.

—Amen.

### **Jaunartzerako**

<sup>1</sup> JESUS MAITEA ZAN azken afarian  
Bera emon nahirik ardao ta ogian  
guretzat zalarik hilteko aurrean  
maitasunak eukan bihotza menpean.

**Gurtu daigun beti  
Jesus Jainko Jauna  
Sakramentu honetan  
gurekin dagona.**

<sup>2</sup> Apostoluei minez esan dautse:  
«Ni gaur saldua naz, bihar hilgo nabe.  
Aitarenganako denpora jat bete  
Hona orain zenbat zaituedan maite».

<sup>3</sup> Ogia harturik mintzo da Jainkoa:  
«Hau da nire gorputz zuek jatekoa»  
Orobat harturik ontzian ardaoa:  
«Hau da neure odol isuritekoa».

## SANTIAGO APOSTOLUA /C

### HITZALDIA

Santiago eguneko hitzaldia gertatzerakoan burura jatortazan arazoak eta galderak hainbat eta hainbat dira:

*Zelan hartu ete dogu sinismena? Zelan landu ete dogu? Zelan ospatzen ete dogu alkarregaz? Zelan eskuratzen ete deutsegu gure seme-alabei edo ondorengoei?...*

Santiago ez da San Inaziegaz lehia jarri behar dogun santua, bata gailegoena dala eta bestea dala euskaldunona esanaz, haren egunean ez dagoala mezea entzuteko "obligaziorik" amaitzeko. Zelango *txikikerietan* galtzen garan!

Ba dagoz sakonagotik egin geikezan galderak, Santiagogan apostolua ikusiz, eta Jesusen autorle edo testigu izatearren bere odola isurteraino bizi izan dauala autorletza hori kontuan izanik. Ba gara gu, geure berbeaz eta bizitzaz, odola isurteraino ez bada ere, Jesus Jaunaren autorle? Egiten dogu autorletza hori, besterik ez bada, geure etxean edo geure parrokian? Holango galderek *zirikatu* egiten gaitue eta urduri jarri, ezta?

Ba, ez deusku besterik esan lehenengo irakurgaiak: «*Apostoluek adoretu emoten eben Jesus Jaunaren biztuerearen autormena, eta haren eskuz herrian mirari eta harrigarri asko egiten ziran*». Horixe da, senideok, kristau izatea: Jesusen jarraitzaile, haren biztuerearen autorle... Espiritu Santuaren esanetara.

Pentsatzekoa da ea "*buztinezko ontzietan daroagula hain ondasun ederra*" esan deuskun Paulori jarraituta, ontzia apurtu ez ete jakun, eta hor zehar galdu ez dogun sinismena, guk besterik uste izan arren.

Gu ez gara *Jesusen autorle sutsuak*, ezta? *Jesusen biztuereak* –berba hori behin eta barrero erabili arren, batez ere hiletetan– *ez dauka eraginik gure eguneroko bizitzan*, ezta? *Sinismena autortzearren, bizitza galtzeraino* ez ginatete helduko, ezta? Hortxe dago gure jokabidea: apenas lantzen dogu gure sinismena: *ez dogu ebanjelioa irakurteko ohiturarik; ez eta mezatan entzundako irakurgaiak hausnartzekorik; edo sinismen hori elikatzeko, beharrezko dogula ospatzea, alkarbanantzea, jaunartzea eta pobretasunean bizi izatea ere ez dogu uste...*

Eta, behar bada, Elizearen zoriak ez gaitu kezkatu ere egiten, ez dogulako gure sinismenaren altzo eta euskarri ikusten. Ez ete da, gero, gure sinismena *kontsumo-iturri* bat, gure seme-alabengan ezelango eraginik ez daukana, geugan ere *ezkutuko* eta *autortu-ezineko* eraginen bat baino ez daualako? Ona litzateke hautsok astintzea Santiagoren apostolutza ospatzean.

Jesusek dei egin eutsen, eta haren jarraitzaile egin ziran; eta jarraitzaileen artean leku euken andrazkoek ere; eta ez bakarrik garbitzaile, sukaldari edo errekadista huts lez, benetako autorle lez baino. Orduko ezin taldetan ikusi ez zana!

Hori kontuan hartuta, ulertu daigun gure sinismena, ez Jainkoari gure ezinetan laguntza eskatzeko era bat (argi dinosku ebanjelioak *ez dakigula-ta zer eskatzen dogun*) , Jesus, berari jarraitzean, ezagutzeko era lez baino, eta bere autorle izateko amesean, eta taldean, emakumeak ere tarteko dirala, elikatzeko, ospatzeko eta elkar bizi izateko eta maitatzeko amesean.

Beharrezko doguz, senideok, "Biblia-Taldeak", "Otoitz-Taldeak"... Beharrezko doguz bakarreko otoitzaldiak, eta ebanjelio irakurketak... Beharrezko dogu ikastea eta mezatan *egoteaz* ez konformatzea... Beharrezko dogu Elizearen zoriaz arduratzea, eta bakotxak bere zerbitzu lekua aurkitzea.

Horixe da Santiago apostoluaren liturgia ospatzeak eskeintzen deuskuna. Zein izango da gure erantzuna? Ez daitela izan, behintzat, santuak alkarren arteko le-hian jartea, Jesusen jarraitzaile izatean gure eredu ikustea baino.